

Autor Roberto Reeberg cu buki y CD nobo

Diaranson ultimo a tuma luga den Biblioteca Nacional na playa e lansamento y presentacion di e buki y CD nobo di e autor/ compositor Arubiano Sr. Roberto Reeberg. Señor Robert Reeberg no ta un desconoci ya cu den pasado el a yega di participa varios biaha den festival di Bos y Landia y na varios ocasion tabata e compositor di e tema di aña di e siman di buki di Biblioteca Nacional.

Nos ta corda e exito di algun aña pasa "Sigui lesa bay" durante e tema "Nos mundo ta draai y ami ta sigui lesa bay". E tambe ta e compositor di e famoso cantica pa mucha "e gay malo" cu dife-

rente scol preparatorio ta siña na chikitinnan. Señor Robert Reeberg tambe a yuda varios biaha e scolnan catolico cu e canticanan religioso cu Zuster Juliette.

E biaha aki Robert a saca un CD cu 13 cantica pa mucha na e temanan varia y educativo, manera Enemigo di sushi, Mucha responsabel, Un buki pa mi lesa, ora di skeiro djente. Un CD ta bale la pena pa nos muchanan tin. Tur e canticanan ta bou di encargo di señora Maybelline Arends-Croes y e coro Tutti Frutti ta canta nan. Señor Ivan Quandus ta e areglista.

E titulo di e CD ta "Canta cu alegria". Como autor señor Reeberg tambe a yega di saca varios

buki pa mucha e ultimo añanan. Nos ta corda e bukinan exitoso di dje manera "E anochi cu Sinterklaas a topa cu Santa Claus" y "e mago di Sero Teishi". Otro bukinan di señor Reeberg ta entre otro Capa Blou, Shete den un solo tiro, E hobby di Rino, Cant'i lama y Cindy Rella. E biaha aki Roberto a trece un buki nobo riba mercado cu ta yama "Un bula den lama". E buki aki ta trata di un leon cu ta landa yega Aruba. Despues cu e barco riba cual e tabata, a sigui su rumbo pa Merca. E lansamento y presentacion di e buki y CD nobo di señor Reeberg tabata bon hinca den otro.

Despues cu Zuster Juliette a habri e atardi cu oracion, e MC señora

Olga Buckley a conta algo di e biografia di señor Reeberg. Prome a lansa e buki nobo cu señor Reeberg a dedica na su nietonan Raheem y Shanty, Prome a lansa e buki nobo na Hulanda. Señor Reeberg a conta un pida di e buki cu dramatisacion di un leon.

A regala un buki na señora Astrid Britten, directora di Biblioteca Nacional y na señor Nico Leydens di libreria Van Dorp. E lansamento y presentacion di e CD tabata acompaña cu canto di coro Tutti Frutti y baile di kids in Action bou encargo di señora Debra Boekhoudt. E CD tambe ta dedica na e nietonan di señor Reeberg. Nos ta desea Robert pabien y exito cu su obranan. □

